

E MËRKURË

FTESA

D O Zot, hapi buzët e mia.

C Dhe goja ime do të kumtojë lavdet e tua.

V. Lavdi Atit e Birit e Shpirtit Shenjt,

P. *si ka qenë në fillim,
ashtu tash e përgjithmonë e jetës. Amen.*

**Ant. Dëgjojeni sot zërin e Zotit:
mos e bëni zemrën tuaj gur.**

Ejani t'i këndojmë Zotit, *
t'i brohorasim Hyjit, Shëlbuesit tonë.

T'i dalim para me falënderje, *
t'i këndojmë këngë hareje! *(Ant.)*

Sepse Hyj i madhërishëm është Zoti, *
Mbret i madhërueshëm mbi të gjithë zotat!
Sepse në dorën e tij janë thellësitë e tokës, *
të tijat janë edhe majat e maleve,
i tiji është deti - ai e krijoi, *
duart e tija e formuan tokën. *(Ant.)*

Ejani ta adhurojmë, të biem përmbys para tij, *
të biem në gjuhë para Zotit që na krijoi!
Sepse ai është Hyji ynë,
ne jemi populli i kullosës së tij, *
grigja që ai ruan. *(Ant.)*

Oh sikur ta ndienit sot zërin e tij: *
"Mos e bëni zemrën tuaj gur porsì në Meribë,
porsì në ditë të Masës në shkretëtirë, †
kur etërit tuaj më vunë në sprovë: *
më provuan megjithëse i kishin parë veprat e mia. *(Ant.)*

Dyzet vjet më mërzi të ajo brezni †
e thashë: 'Popull zemërluhatshëm është ky, *
që s'i njuh udhët e mia.'

Prandaj u përбетova në hidhërimin tim: *
'Askurrë s'do të hyjnë në prehjen time!'" *(Ant.)*

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen. *(Ant.)*

SHËRBESA E LEXIMEVE

V. Hyj, më eja në ndihmë!

P. *O Zot, shpejto të më ndihmosh!*

V. Lavdi Atit e Birit e Shpirtit Shenjt,

P. *si ka qenë në fillim,
ashtu tash e përgjithmonë e jetës. Amen.*

Kjo hyrje nuk përdoret kur Shërbesa e lutjes fillon me Ftesë.

Himni

Tani koha e pëlqyeshme
shkëlqen dhuruar nga Hyji,
të shërojë botën e mekur
me ilaçin e kursimit.

Me dritë të hijshme të Krishtit
ndriçon dita e shpëtimit,
ndërsa zemrat çarë prej fajesh
përt'rihen nga agjërimi.

Ne këtë me trup e mendje,
ta shtiem n' dorë, Zot, na kryej,
që me kalim fatbardhë Pashkës
s'amshuar t'i afrohem.

Ty gjithësia e sendeve
t'adhuroftë, Trini e mëshirshme.
Të përt'rirë me anë të faljes,
ne të këndojmë një këngë të re. Amen.

Ose një himn tjetër, apo një këngë e miratuar nga autoritetet kishtarë.

Ant. 1 *Para fytyrës sate, o Zot, hir dhe besnikëri.*

Psalmi 89 /88/ (2-38)

Mëshira e Zotit ndaj shtëpisë së Davidit

Hyji, prej pasardhësve të tij, si pati premtuar, ia ngriti Izraelit Shëlbuesin: Jezusin (Vap 13, 23).

I (2-19)

Dashurinë e Zotit gjithmonë do të këndo, *
brez pas brezi goja ime
do të shpallë besnikërinë tënde.

Sepse the: »Hiri im qëndron për amshim«, *
në qiell është e themeluar besnikëria jote!
»Bëra besëlidhje me të zgjedhurin tim, *
i jam betuar Davidit, shërbëtorit tim:
Farën tënde do ta ruaj për amshim, *
froni yt do të qëndrojë brez pas brezi.«

Qiejt i këndojnë veprat e tua, o Zot, *
kuvendi i shenjtërve besnikërinë tënde!
E kush ndër re është i barabartë me Zotin? *
Kush është i ngjashëm ndër zota me Zotin?

I tmerrshëm është Hyji në logun e shenjtërve, *
i madh e i përfrigueshëm mbi të gjithë
ata që i rrinë përreth.

O Zot, Hyji i ushtrive, kush është si ti? *
I pushtetshëm je, o Zot, e besnikëria të rrethon!

Ti zotëron kreninë e detit, *
ua ul kryet valëve të tërbuara.
Ti e copëtove Rahabin dhe e shqelmove, *
me krah të fuqishëm armiqtë i shpërndave.

Yti është qielli, jotja është Toka, *
ti e krijove tokën dhe gjithçka ajo përmban.
Veriun e jugun ti i krijove. *
Tabori e Hermoni i brohoritin Emrit tënd.

Krahu yt është plot fuqi, *
e fortë është dora jote, e lartësuar e djathta jote!
Drejtësia dhe e drejta janë themeli i fronit tënd, *
dashuria dhe e vërteta gjithkund të shkojnë përpara.

Lum ai popull që di të brohorasë, *
që ecën në dritën e fytyrës sate, o Zot!
Përherë do të gëzojë në Emër tënd, *
e do të mburret në drejtësinë tënde.

Sepse ti je stolia e fuqisë së tyre *
e me hirin tënd rritet fuqia jonë.
Sepse i Zotit është shqyti ynë, *
mbreti ynë i Shenjtit të Izraelit!

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 1 *Para fytyrës sate, o Zot, hir dhe besnikëri.*

Ant. 2 *Krishti, Biri i Hyjit, u bë njeri prej fisit të Davidit.*

II (20-30)

Dikur, në një vegim, fole me miqtë e tu e u the: †
»Trimit të trimit ia dhashë ndihmën time, *
e lartësova një djalosh nga populli.

Gjeta Davidin, shërbëtorin tim, *

e leva me vajin tim të shenjtë.
 Dora ime gjithmonë do të jetë me të, *
 dhe krahu im përherë do ta kërthndezë.
 Armiku askurrë nuk do të ngadhënjejë mbi të, *
 i paudhi nuk do të mund ta ndrydhë.
 Unë do t'i thyej para tij armiqtë e tij, *
 do t'i zhbij kundërshtarët e tij.
 Besa ime dhe mëshira ime do të jenë me të, *
 në saje të Emrit tim do t'i rritet pushteti.
 Dorën e tij do ta shtrij mbi det, *
 të djathtën e tij përmbi lumenj.
 Ai do të më thërrasë: 'Ati im, *
 Hyji im, Qeta e shpëtimit tim!',
 kurse unë do ta bëj të Parëlindurin tim, *
 më të madhin ndër mbretërit e tokës.
 Për të gjithmonë do ta ruaj mëshirën, *
 Besëlidhjen me të kurrë s' do ta thyej.
 Trashëgiminë e tij do ta bëj të amshueshme, *
 fronin e tij prosi ditët e qiellit.
 Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen.

Ant. 2 *Krishti, Biri i Hyjit, u bë njeri prej fisit të Davidit.*

Ant. 3 *Hyji i premtoi Davidit, shërbëtorit të vet:
 fara jote do të qëndrojë për mashim.*

III (31-38)

Nëse bijtë e tij e lënë Ligjin tim, *
 e në mos ecshin ligjeve të mia,
 po nuk zbatuan vendimet e mia, *
 po i shkelën urdhërimet e mia,
 me thupër do t'i ndëshkoj mëkatet e tyre, *
 me frushkull të rreptë paudhësitë e tyre.

Por nuk do ta këpus dashurinë me të *
 as nuk do ta prish besnikërinë time.
 Nuk do ta thyej besëlidhjen time *
 as s' do t'i zhbëj premtimet e mia.

Një herë u përbetova me shenjtërinë time: *
 'Askurrë Davidin nuk do ta lë në rrenë!'

Fara e tij do të qëndrojë për amshim, *
 fronin e tij para meje si Dielli,
 do të qëndrojë për amshim si Hëna, *
 dëshmitare besnike mbi re.«

Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen.

Ant. 3 *Hyji i premtoi Davidit, shërbëtorit të vet:
 fara jote do të qëndrojë për amshim.*

D Kthehuni dhe bëni pendesë,
C bëhuni të ri në zemër dhe në shpirt.

Leximi i parë

Prej librit të Daljes 33, 7-11. 18-23; 34, 5. 29-35

Në ato ditë, Moisiu e merrte për çdo çojë Tendën dhe e ngrehte për Të jashtë tëbanishtës, mjaft larg tëbanishtës. E quajti: Tenda e takimit. Kushdo që donte të marrë ndonjë këshillë prej Zotit, i duhej të dalë jashtë tëbanishtës për të shkuar te Tenda e takimit.

Kur Moisiu dilte për të shkuar te Tenda, mbarë populli ngritej në këmbë e qëndronte në derë të çadrës së vet e shikonte pas Moisiut deri sa ky hynte në Tendë. Kur Moisiu hynte në Tendë, zbriste shtylla e resë në derën e Tendës e aty qëndronte. Atëherë Zoti fliste me Moisiun.

Mbarë populli e shihte shtyllën e resë që qëndronte në hyrjen e Tendës, e të gjithë ngriteshin në këmbë e përkuleshin thellë në adhurim në derë të tendës së vet. E Zoti fliste me Moisiun fytyrë për fytyrë, siç flet njeriu me mikun e vet. Mandej Moisiu kthehej në tëbanishtë, kurse ndihmësi i tij, djaloshi Jozueh, biri i Nunit, nuk dilte jashtë Tendës.

Moisiu i tha: »Ma dëfto lavdinë tënde.«

Zoti i përgjigji: »Unë do ta kaloj para teje tërë shkëlqimin tim, do ta kumtoj para teje emrin tim: Zot; i jap përkrahjen time kujt dua t'ia jap, e mëshiroj atë, për të cilin dua t'i bëjë mëshirë.« E shtoi përsëri: »Por nuk do të mund ta shikosh fytyrën time, sepse njeriu nuk mund të më shohë mua e të mbetet në jetë.« Zoti shtoi edhe: »Qe, tha, ka vend këtu përngjat meje. Qëndro mbi shkëmb! Kur të kalojë lavdia ime, do të të fus në plasën e shkëmbit e do të të mbroj me të djathtën time derisa të kaloj; do ta heq dorën time e do të ma shikosh shpinën; porse fytyra ime nuk mund të shihet.«

Atëherë Zoti zbriti në re, u ndal aty, përngjat tij dhe e shpalli emrin e Zotit.

Kur Moisiu zbriti nga mali Sinai i mbante dy rrasat e Dëshmisë dhe nuk e dinte se fytyra e tij lëshonte rreze për shkak të bisedimit të tij me Zotin. Kur Aroni e bijtë e Izraelit panë se prej lëkurës së fytyrës së tij dilnin rreze, patën frikë t'i afrohen. Atëherë Moisiu i thirri Aronin e të gjithë krerët e bashkësisë e shkuan tek ai. E pasi bisedoi me ta, erdhën edhe të gjithë izraelitët tek ai, dhe Moisiu u tregoi gjithçka i kishte urdhëruar Zoti në malin Sinai. Kur Moisiu e kreu bisedën me ta, ia qiti fytyrës një mbulesë, të cilën e hiqte kur hynte te Zoti e ndërsa bisedonte me Të, derisa dilte jashtë. Kur dilte për t'u treguar izraelitëve çfarë i ishte urdhëruar, izraelitët shihnin se prej lëkurës së fytyrës së Moisiut dilte dritë, por ai e mbulonte përsëri fytyrën e vet derisa nuk hynte të fliste përsëri me Zotin.

Përgjigja *Krh. 2 Kor 3, 13. 14. 16. 18*

C Moisiu vinte vel përmbi fytyrë, në mënyrë që izraelitët të mos e shihnin mbarimin e një shkëlqimi të kalueshëm: * *vetëm kur të kthehet Izraeli te Zoti do të hiqet veli.*

D Ne të gjithë, të cilët, me fytyrë të zbuluar, bredhim lavdinë e Zotit, me anë të Shpirtit të Zotit, shndërrohemi në të njëjtën trajtë, nga lavdia në lavdi, sipas veprës së Shpirtit të Zotit;

C *vetëm kur të kthehet Izraeli te Zoti do të hiqet veli.*

Leximi i dytë

Nga "Libri i Antolikut" i shën Teofilut nga Antiokia, ipeshkëv

(Lib. I, 1.7; PG 6, 1026-1027. 1035)

Lum ata që janë të pastër në zemër sepse do ta shohin Hyjin

Në qoftë se ti thua: ma dëfto Hyjin tënd, unë do të të them: ma dëfto njeriun që është në ty dhe unë do ta dëftoj Hyjin tim. Më trego pastaj nëse sytë e shpirtit tënd shohin dhe veshët e zemrës sate dëgjojnë.

Vërtet, ata që shohin me sytë e trupit vërejnë se çka ndodhet në këtë jetë tokësore dhe dallojnë gjërat e ndryshme: dritë e errësirë, të bardhë e të zezë, çka është e pahijshme e çka është e bukur, çka është harmonike e çka është e çrregullt, çka është e çka s'është e matur, çka tepron në pjesë përbërëse e çka mungon. E njëjta gjë mund të thuhet për sa u përket veshëve, d.m.th. tinguj të hollë, të ulët e të ëmbël.

Të njëjtin funksion e kanë edhe veshët e zemrës dhe sytë e shpirtit në lidhje me pamjen e Hyjit. Pra, Hyji shihet nga ata që mund ta shohin, d.m.th. nga ata që i kanë sytë. Por disa i kanë të mjegullt dhe nuk e shohin dritën e diellit. Prapëseprapë, megjithëse të verbërit nuk shohin, kjo nuk domethënë se dielli nuk shkëlqen. Me të drejtë, pra, ata kujtojnë se shkakun e errësirës e kanë në vetvete dhe në sy të vet.

Ti i ke sytë e shpirtit tënd të mjegullt për shkak të mëkateve të tua dhe të punëve të tua të këqija.

Porsi pasqyrë e kthjellët, kështu duhet të jetë i pastër shpirti i njeriut. Por nëse pasqyra ndryshket, fytyra e njeriut nuk mund të shihet më në të. Po ashtu, kur mëkati e pushton njeriun, ky s'mund më ta shohë Hyjin.

Kallëzoje, pra, vetveten. Trego a mos je ndoshta keqbërës, vjedhës, shpifës, plot hidhërim dhe smirë, mendjemadh, koprrac, vrazhdët me prindërit e tu. Hyji nuk u dëftohet atyre që bëjnë këto gjëra, nëse përpara nuk pastrohen nga çdo njollë. Këto gjëra të errësojnë, sikur bebet e tua të kishin ndonjë diafragmë që t'i pengojë për t'u ngulur në diell.

Por, nëse do, mund të shërohesh. Besoji mjekut dhe ai do t'i operojë sytë e shpirtit tënd dhe të zemrës sate. Kush është ky mjek? Është Hyji, i cili me anë të Fjalës e të urtisë shëron dhe jep jetë. Hyji, me anë të Fjalës e të urtisë, ka krijuar të gjitha sendet: "Prej fjalës së Zotit u krijuan qiejt, prej frymës së gojës së tij çdo trup qiellor" (Ps 32 /33/, 6). Urtia e tij është e pakufi. Me dijeni, Hyji i vuri themelet e tokës; me urtinë, i përftoi qiejt. Në saje të diturisë së tij, hapen humnerat dhe nga retë cirkon vesa.

Nëse i kupton këto gjëra, o njeri, e nëse jeton në pastërti, në shenjtëri e në drejtësi, mund ta shohësh Hyjin. Por, më së pari, le të vendosen në zemrën tënde feja e frika e Hyjit, atëherë do t'i marrësh vesh të gjitha këto. Kur do ta kesh zhveshur vdekshmërinë tënde dhe do të jesh veshur me pavdekshmërinë, atëherë do ta shohësh Hyjin sipas meritave të tua. Ai, bashkë me shpirtin tënd, e ringjall edhe mishin tënd, duke e bërë të pavdekshëm e atëherë, nëse tani beson në të, je bërë edhe ti i pavdekshëm, do ta shohësh të Pavdekshmin.

Përgjigja *Krh. 2 Kor 6, 2. 4. 7. 5. 6*

C Ja, tani, koha e volitshme, ja dita e shpëtimit. Ta dëftojmë veten si mbarështues të Hyjit. * *Me armë të drejtësisë dhe me fuqi të Hyjit.*

D Me qëndresë të madhe në përgjime dhe në agjërime, në pastërti e dije, me fjalë të vërtetë.

C *Me armë të drejtësisë dhe me fuqi të Hyjit.*

Lutja

Bëj, po të lutemi, o Zot, që, të mësuar nga veprat pendestare, të Kreshmëve dhe të ushqyer me fjalën tënde, të jepemi me gjithë zemër pas dashurisë sate dhe të jemi gjithmonë të bashkuar në lutjen tënde. *Nëpër Zotin.*

LAVDET E MËNGJESIT

V. Hyj, më eja në ndihmë!

P. O Zot, shpejto të më ndihmosh!

V. Lavdi Atit e Birit e Shpirtit Shenjt,

P. si ka qenë në fillim,

ashtu tash e përgjithmonë e jetës. Amen.

Kjo hyrje nuk përdoret kur Shërbesa e lutjes fillon me Ftesë.

Himni

Tashmë, Krisht, diell drejtësie,
t'çahen errësira e mendjes,
të kthejë drita e virtytshme,
kur mbi tokë përtërin ditën.

Duke dhënë kohë të volitshme,
jepi edhe pendim zemrës,
pasi mirësia jote
mëshirë t' madhe tani ia dhuron.

Një farë pendese jepna,
të durojmë për zbutje fajesh,
sado që janë të mëdhaja,
më e madhe është mëshira jote.

Po afrohet dita jote,
me anë t'cilës ndrit çdo gjë,
nga hiri yt hyjnor ne
t' përtërirë të gëzohemi.

Ty gjithësia e sendeve,
t'adhuroftë, Trini e mëshirshme.
Të përt'rirë me anë të faljes,
ne të këndojmë një këngë të re. Amen.

Ose një himn tjetër, apo një këngë e miratuar nga autoritetet kishtarë.

Ant. 1 Gëzoje shpirtin e shërbëtorit tënd, o Zot,
te ti e lartësoj shpirtin tim.

Psalmi 86 /85/ (1-17) Urata në vështirësi

Qoftë bekuar Hyj që jep çdo ngushëllim (2Kor 1, 3. 4).

Ma vër veshin, o Zot, e më dëgjo, *
sepse jam i mjerë e skamnor.

Ma ruaj shpirtin se jam i devotshmi yt, *
Hyji im, shpëtoje shërbëtorin tënd që shpreson në ty.

Ki mëshirë për mua, o Zot, *
se gjithë ditën të thërras në ndihmë.

Gëzoje shpirtin e shërbëtorit tënd, *
sepse te ti, o Zot, e lartësoj shpirtin tim.

Sepse ti, o Zot, je i ëmbël e i butë, *
plot mëshirë për ata që të thërrasin në ndihmë.

Dëgjoje, o Zot, uratën time, *
vështroje zërin e lutjes sime.

Në ditë të vështirë klitha te ti *
pse e di se ti më dëgjon.

Nuk ka hyjni që të përngjet ty, o Zot, *
asgjë s'mund të matet me veprat e tua.

Të gjithë paganët prej teje të krijuar, †
do të vijnë e do të të adhurojnë, o Zot, *
dhe do të madhërojnë Emrin tënd,

sepse ti je i madhërueshëm e bën mrekulli, *
ti je i vetmi Hyj.

Ma mëso, o Zot, udhën tënde, †
që të eci sipas drejtësisë sate, *
mësoje zemrën time ta nderojë Emrin tënd.

Do të të falënderoj, o Zot, Hyji im,
me gjithë zemrën time, *
për amshim do ta madhëroj Emrin tënd.

Sepse e madhe është mëshira jote mbi mua, *
ti e nxore shpirtin tim nga thellësia e Nëntokës.

O Hyj, krenarët u çuan peshë kundër meje, †
një grumbull të marrësh ma helmuan jetën *
e për ty nuk kanë kujdes.

Por ti, o Zot, Hyj i mëshirshëm e i dhimbshëm, *
i ngadalshëm në zemërim, plot dashuri e duresë,

shiko mbi mua e ki mëshirë për mua, †
jepi fuqi shërbëtorit tënd *
dhe shpëtoje birin e shërbëtores sate.

Bëj për mua një shenjë mirësie, †
që të shohin urryesit e mi e të turpërohen *
se ti, o Zot, më ndihmon e më ngushëllon.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 1 *Gëzoje shpirtin e shërbëtorit tënd, o Zot,
te ti e lartësoj shpirtin tim.*

Ant. 2 *Lum ai që ecën në drejtësi dhe flet me çiltërsi.*

Kënga Is 33, 13-16 *Hyji do të gjykojë me drejtësi*

Ky premtim u bë për ju, për fëmijët tuaj e për të gjithë ata që janë larg (Vap 2, 39).

»Ju që larg jeni, dëgjoni çka bëra, *
njihen, ju të afërm, fuqinë që unë kam!«

U tmerruan në Sion mëkatarët, *
tmerri i pushtoi të paudhët:
»Kush prej jush mund të banojë me zjarr përpirës? *
Kush prej jush do të banojë me flakë të përhershme?«

Ai që ecën me drejtësi, *
ai që flet çka është e drejtë,
që s'kërkon fitim në cubëni, *
që shkund duart të mos marrë ryshfet,

që mbyll veshët të mos dëgjojë vrasje, *
që mbyll sytë të mos shikojë të keqen,

i tilli do të banojë në lartësi, †
strehimi i tij në qytezë të pathyeshme, *
bukë ka mjaft, ujët s'i mungon.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 2 *Lum ai që ecën në drejtësi dhe flet me çiltërsi.*

Ant. 3 *Brohoritni Zotit, Hyjit tonë.*

Psalmi 98 /97/ (1-9)
Ngadhënjimi i Zotit në ardhjen e tij të dytë

Me sytë e mi e pashë shëlbimin që ti e bëre gati në sy të të gjithë popujve (Lk 2, 30. 31).

Këndoni Zotit një këngë të re, *
sepse bëri vepra të mrekullueshme!

Ngadhënjeu me fuqi të së djathtës së vet, *
me fuqi të krahut të vet të shenjtë.
Zoti e dëftoi shpëtimin e vet, *
përpara paganëve e zbuloi drejtësinë e vet.

I ra ndër mend dashuria dhe besnikëria e vet *
kundrejt shtëpisë së Izraelit.
Të gjitha skajet e botës e panë *
shëlbimin e Hyjit tonë.

Mbarë Toka le t'i brohorasë Zotit, *

le të gëzojë, të duartrokasë e të këndojë.

Këndoni Zotit me harpë, *
me tinguj veglash muzikore,
me trumbetë e me zë të pipëzës së bririt, *
brohoritni para fytyrës së Zotit, Mbret!

Le të buçasë deti me ç'ka në të, *
rruzulli me banuesit e tij;

lumenjtë le të duartrokasin †
e malet le të gërthasin me hare, *
para Zotit që po vjen për të gjykuar dheun.

Ai do ta gjykojë botën me drejtësi *
e popujt me maturi.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 3 Brohoritni Zotit, Hyjit tonë.

Leximi i shkurtër Is 33, 15-16

Ai që ecën me drejtësi, ai që flet çka është e drejtë, që s'kërkon fitim në cubëni, që shkund duart të mos marrë rryshfet, që mbyll veshët të mos dëgjojë vrasje, që mbyll sytë të mos shikojë të keqen, i tilli do të banojë në lartësi, strehimi i tij në qytezë të pathyeshme, bukë ka mjaft, uji s'i mungon.

Përgjigja e shkurtër

C Lum ai që të kërkon me gjithë zemër
* dhe ecën në ligjet e tua.

*Lum ai që të kërkon me gjithë zemër
dhe ecën në ligjet e tua.*

D Është besnik ndaj mësimëve të tua
dhe ecën në ligjet e tua.

Lavdi Atit e Birit e Shpirtit Shenjt.

*Lum ai që të kërkon me gjithë zemër
dhe ecën në ligjet e tua.*

Kënga ungjillore (Benedictus)

Ant. Nuk erdha për ta shlyer Ligjin ose Profetët,
por të përkryej, thotë Zoti.

Qoftë bekuar Zoti, Hyji i Izraelit, *
që e pa dhe e shpërbleu popullin e vet!

Ai e ngriti Shpëtimtarin tonë *
në shtëpinë e Davidit, shërbëtorit të vet,

sikurse premtoi kaheër *
me gojë të profetëve të tij të shenjtë:

se do të na shpëtojë prej armiqve tanë *
dhe prej dorës së të gjithë atyre që na urrejnë;

se do të bëjë mirësinë që ua premtoi etërve tanë *
e do t'i bjerë në mend Besëlidhja e tij e shenjtë

e betimi që bëri në të mirën e Abrahamit, atit tonë *
se do të na e bëjë të mundshme t'i shërbejmë pa frikë,

të çliruar nga duart e armikut *
në shenjtëri e drejtësi para tij
për çdo ditë të jetës sonë.

E ti, o djalosh, do të quhesh profet i të Tejetlartit, *
sepse do të shkosh përpara Zotit
për t'ia përgatitur udhët,

për ta vënë në dijeni popullin e tij *
se Hyji do ta shëlbojë duke ia falur mëkatet e tija,

në saje të zemrës së dashur të Hyjit tonë *
që do të na e dërgojë në pasi prej qiellit Diellin,

për të shndërritur ata që gjenden në errësi

dhe në hijen e vdekjes, *
për t'i drejtuar hapat tanë në udhën e paqes.“

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen

Ant. *Nuk erdha për ta shlyer Ligjin ose Profetët,
por të përkryej, thotë Zoti.*

Lutjet e besimtarëve

I bekuar qoftë Krijuesi i shëlbimit tonë. Ai ka dëshiruar që njerëzit në të të bëhen krijesa të reja dhe në Të të ripërtërihet gjithçka. Prandaj edhe ne, të përshkuar me shpresë, ta lusim kështu:

Na përtërij, o Zot, me shpirtin tënd.

O Zot, Ti ke premtuar tokën e re dhe qiellin e ri. Na përtërij gjithnjë me Shpirtin tënd
— që të mund të gëzohemi me Ty përgjithmonë në Jerusalemin qiellor.
Bëj që të bashkëpunojmë gjithmonë me Ty për ta përshkuar këtë botë me Shpirtin tënd
— që kjo shoqëri tokësore të mund ta arrijë sa më me sukses qëllimin e vet në drejtësi, në dashuri dhe në paqe.
Na ndihmo ta largojmë indiferencën dhe pakujdesinë nga jeta jonë
— dhe me gëzime të përhershme të marrim pjesë në dhuratat e shëlbimit.
Na liro nga e keqja
— dhe mos lejo të na zhgënjejë mendjelehtësia e cila errëson të mirën.

Ati ynë, që je në qiell, u shenjtëroft emri yt. Ardhhtë mbretëria jote, u bëftë vullnesa jote, si në qiell ashtu në tokë.
Bukën tonë të përditshme, na e jep sot, na i fal fajet tona si i falim në fajtorët tanë, e mos na lër të biem në tundim, por na liro nga i Keqi. Amen.

Lutja

Bëj, po të lutemi, o Zot, që, të mësuar nga veprat pendestare, të Kreshmëve dhe të ushqyer me fjalën tënde, të jepemi me gjithë zemër pas dashurisë sate dhe të jemi gjithmonë të bashkuar në lutjen tënde. *Nëpër Zotin.*

Përfundimi i Orës, sikurse në Shërbesën e rëndomtë.

ORA E MESME

E Tretë – e gjashtë – e nëntë

V. Hyj, më eja në ndihmë!
P. *O Zot, shpejto të më ndihmosh!*

V. Lavdi Atit e Birit e Shpirtit Shenjt,
P. *si ka qenë në fillim,
ashtu tash e përgjithmonë e jetës. Amen.*

Pason himni i përshtatshëm.

HIMNI

Ora e tretë

Himni

Me fenë e Hyjit që jetojmë,
me atë shpresë që prorë besojmë,
nëpër hir të dashurisë
Krishtit lavdinë t'i këndojmë.

I çuar në orën e tretë
n' flijimin e mundimeve,
mbi atë kryq që mbarti u var,
tërhoqi delen e humbur.

Pra t' nënshtuar të lutemi,
të lirë me anë të shëlbimit,
që të shkëpusë nga shekulli
ata që u falën mëkatet.

Krishtin dhe Atin t'i lusim,
Shpirtin e Krishtit e t'Atit,
një e vetme e gjithpushtetshme,
Trini, përkrahi ata, që t'luten. Amen.

Ora e gjashtë

Himni

N'atë orë që Krishti pati etje,

në atë orë që n'kryq e ngjitën,
kush di ta lexojë psalterin
t'i këndojë etjes s'drejtësisë.

Bashkë me etje qoftë uria,
për atë që vdiq për ne,
mëkati na qoftë neveri,
virtyti na qoftë dëshirë.

Bagmi i Shpirtit të Shenjtë
ndikoftë sot mbi këngë e qeste,
që zjarrin e trupit ta ngrijë,
acarin e shpirtit ta nxejë.

Krishtin dhe Atin t'i lusim,
Shpirtin e Krishtit e të Atit;
një e vetme e gjithpushtetshme
Trini, përkrahi ata që luten. Amen.

Ora e nëntë

Himni

Tri herë çdo tri orë numri
i shenjtë për ne përhapet,
n'emrin e shenjtë të Jezusit
t'i lypim dhuntitë e faljes.

Ja rrëfimi i hajdutit
fiton hirin e Krishtit,
lavdi ynë, ja përkushtimi,
mëshirën le ta blejnë.

Me anë t'kryqit humbet vdekja,
e pas territ kthehet drita:
si çahet terri i kobëve,
lulëzofte shkëlqimi i mendjeve.

Krishtin dhe Atin i lusim,
t'Krishtit e të Atit Shpirtin:
një e vetme e gjithëpushtetshme
Trini, përkrahi ata që luten. Amen.

Ant. 1 *Ja ditët e pendesës,
koha e faljes dhe e shpëtimit.*

Psalmi 119 /118/ XIV (105-112)

Fjala jote është dritëz për këmbët e mia, *
dritë për udhët e mia.

U përбетова dhe do ta mbaj fjalën: *
do t'i ruaj gjyqet e drejtësisë sate.

Jam për së tepërmi i përvuajtur, o Zot, *
ma përtërit jetën sipas premtimit tënd.

Pranoji, o Zot, dhuratat e gojës sime *
dhe m'i mëso gjyqet e tua.

Jeta ime është gjithmonë në rrezik, *
por nuk e harroj Ligjin tënd.
Të mbrapshtët vunë leqe kundër meje, *
por nuk iu shmanga porosive të tua.

Dëshmitë e tua janë trashëgimi im i përhershëm, *
janë kënaqësia e shpirtit tim.

E përul zemrën time që t'i kryej urdhërimet e tua *
përherë e deri në fund.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 1 *Ja ditët e pendesës,
koha e faljes dhe e shpëtimit.*

Ant. 2 *Unë jam i Gjalli, thotë Zoti,
nuk e dëshiroj vdekjen e mëkatarit*

por që ai të kthehet dhe të jetojë.

Psalmi 70 /69/ (2-6) O Hyj, më eja në ndihmë

Ndore tënde, o Zot, se u mbytëm! (Mt 8, 25).

O Hyj, deh, më eja në ndihmë, *
o Zot, nxito të më ndihmosh!
U marrofshin dhe u turpërofshin *
të gjithë ata që kërkojnë të ma marrin jetën.

U zbrapsshin dhe u turpërofshin ata *
që ma dëshirojnë të keqen!
U zbrapsshin të turpëruar *
ata që më thonë: »Mirë, shumë mirë!«

Le të galdojnë e le të gëzojnë *
të gjithë ata që të kërkojnë ty,
le të thonë përherë: »I madh është Hyji!« *
ata që e duan shëlbimin tënd.

E unë jam i vobektë e skamnor: *
o Hyj, shpejto të më ndihmosh,
sepse ti je ndihmëtar i shpëtimitari im, *
o Zot, deh, mos vono!

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 2 *Unë jam i Gjalli, thotë Zoti,
nuk e dëshiroj vdekjen e mëkatarit
por që ai të kthehet dhe të jetojë.*

Ant. 3 *Ne jemi të qëndrueshëm në provë:
fuqia jonë është drejtësia e Hyjit.*

Psalmi 75 /74/ (2-11) Hyji, gjykatës i gjithëmbarshtëm

I rrëzoi princat prej froneve të tyre e i lartësoi të përvujtët (Lk 1, 52).

Do të të këndojmë lavde, o Hyj, †
do të lavdërojmë e do ta thërrasim Emrin tënd, *
do t'i shpallim mrekullitë e tua.

»Kur unë të caktoj kohën *
do të gjykoj me drejtësi.
Në dashtë, le të lëkundet toka
me të gjithë banorët e vet, *
unë jam ai që ia kam forcuar shtyllat.
U thashë krenarëve: »Mos u krenoni!« *
edhe të paudhëve: »Mos çoni krye!
Mos e lartësoni ashtu kryet tuaj, *
mos folni kundër Hyjit poshtërsi!«

As prej lindjes, as prej perëndimit, *
as prej shkretëtirës nuk vjen lartësimi,
sepse gjykatës është Hyji: *
këtë e përul e lartëson atë.

Sepse në dorë të Zotit është gota *
plot verë shkumuese me dra përzier.

Prej saj ai jep të pihet: †
do ta pinë veç deri me fundëri mëkatarët, *
krejtësisht do ta pinë deri edhe draun.«

E unë do ta shpall përgjithmonë, *
do t'i këndoj Hyjit të Jakobit.
»Kryet do t'ua thyej të gjithë keqbërësve, *
kurse kryet e të drejtë do të lartësohet.«

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 3 *Ne jemi të qëndrueshëm në provë:
fuqia jonë është drejtësia e Hyjit.*

Në orët e tjera përdoren psalmet e tjera plotësuese (Hyrja fq. ???).

Ora e tretë

Leximi i shkurtër Ez 18, 30b-32

Kthehuni dhe ndrequni nga të gjitha paudhësitë tuaja dhe paudhësia s'do të jetë më shkak për rënien tuaj. Flakni larg jush të gjitha pabesitë tuaja, me të cilat u bëtë të pabesë e përtëriteni zemrën e shpirtin tuaj! Përse të vdisni, shtëpia e Izraelit? Unë nuk i kënaqem vdekjes së mëkatarit - thotë Zoti Hyj. Kthehuni e jetoni!

- D Krijë në mua, o Zot, një zemër të pastër,
- C përtërije në mua një shpirt të qëndrueshëm.

Ora e gjashtë

Leximi i shkurtër Zak 1, 3b-4

Kthehuni kah unë - thotë Zoti i Ushtrive, e edhe unë vetë do të kthehem kah ju - është fjala e Zotit të Ushtrive. - Mos u bëni si etërit tuaj, të cilëve u thoshin profetët e mëparshëm: 'Kështu thotë Zoti i Ushtrive: Kthehuni nga udhët tuaja të këqija e nga synimet tuaja të këqija.' Por, ata s'dëgjuan as s'qenë në kujdes për mua, thotë Zoti.

- D Largoje shikimin prej mëkateve të mia,
- C shlyeji të gjitha fajet e mia.

Ora e nëntë

Leximi i shkurtër Krh. Dan 4, 24b

Shpërblej mëkatet e tua me lëmoshë e paudhësitë e tua me mëshirë ndaj skamnorëve, e Zoti do t'i falë mëkatet tua.

- D Shpirti i penduar të pëlqen, o Zot,
- C ti nuk e përbuz zemrën e penduar, të thërrmuar.

Lutja

Bëj, po të lutemi, o Zot, që, të mësuar nga veprat pendestare, të Kreshmëve dhe të ushqyer me fjalën tënde, të jepemi me gjithë zemër pas dashurisë sate dhe të jemi gjithmonë të bashkuar në lutjen tënde. *Nëpër Zotin.*

Përfundimi i Orës, sikurse në Shërbesën e rëndomtë.

MBRËMËSORJA

V. Hyj, më eja në ndihmë!

P. O Zot, shpejto të më ndihmosh!

V. Lavdi Atit e Birit e Shpirtit Shenjt,

P. *si ka qenë në fillim,
ashtu tash e përgjithmonë e jetës. Amen.*

Himni

O Jezus, themeluesi
i agjërit të kreshmëve,
që për shërim të mendjeve
mëngjillet na i mësove.

Bëju tashti krah Kishës,
e rriji pranë pendesës,
ne shtrirë përdhé të lutemi
për të na i larë mëkatet.

Ti fajet e rikthyera
shlyeji me hirin tënd,
e nga të ardhshmet rojën
me shumë butësi përdore.

Që, të shpërblyer nga veprat
vjetore të pendimit,
të shkojmë gëzimet e Pashkëve
denjësisht për t'i kremtuar.

Ty gjithësia e sendeve
t'adhuroftë, Trini e mëshirshme,
Të përt'rirë me anë të faljes,
ne të këndojmë një këngë të re. Amen.

Ose një himn tjetër, apo një këngë e miratuar nga autoritetet kishtare.

Ant. 1 *Ai që mbjell me lot, do të korrë me gëzim.*

Psalmi 126 /125/ (1-6) O Zot, gëzimi dhe shpresa jonë

Mbasi jeni pjesëtarë në vuajtje, do të jeni edhe në ngushëllim (2 Kor 1, 7).

Kur Zoti i ktheu robërit e Sionit, *
na dukej si të ishim në ëndërr.
Atëherë goja na u mbush me gaz *
e gjuha jonë ia thoshte këngës së gëzimit!

Asohere thuhej ndër paganë: *
»Zoti bëri për ta punë të mëdha!«
Vërtet Zoti bëri për ne mrekulli *
e zemrat na u mbushën me gëzim!

Ktheji, o Zot, robërit tanë *
porsi përrenjtë e mesditës!
Ata që mbjellin me lot, *
deh, le të korrin me gëzim!

Në të shkuar ecnin e qanin *
duke mbartur farën për ta mbjellë,
kurse në kthim do të vijnë plot gëzim *
duke mbartur dorëzat e veta.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 1 *Ai që mbjell me lot, do të korrë me gëzim.*

Ant. 2 *Ndërtoje, o Zot, shtëpinë tonë,
ruaje qytetin tënd.*

Psalmi 127 /126/ (1-5)

Çdo përpjekje është e kotë pa ndihmën e Zotit

Nuk është gjë as ai që mbjell e as ai që lag, por Hyji që bën të rritet. Ju jeni ara e Hyjit e ndërtesa e Hyjit (1Kor 3, 7. 9).

Nëse Zoti nuk e ndërton shtëpinë, *
kot mundohen ata që e ndërtojnë.
Nëse Zoti nuk e ruan qytetin, *
kot rri zgjuar ai që e ruan.

Kot e keni të çoheni para drite *
dhe vonë të shkoni në pushim,
ju që e hani bukën e mundit: *
të dashurve të vet u jep edhe në gjumë.

Ja: bijtë janë dhuratë e Zotit, *
fryti i barkut është shpërblimi i tij.
Porsi shigjetat në dorën e trimit *
të tillë janë djemtë e rinisë.

Lum ai burrë që e mbushi kukurrën me të tillë: *
s' do të turpërohet kur të fjaloset me armiq në log.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 2 *Ndërtoje, o Zot, shtëpinë tonë,
ruaje qytetin tënd.*

Ant. 3 *I lindur para çdo krijese,
Krishti është mbret i gjithësisë.*

Kënga Krh. Kol 1, 3. 12-20

**Krishti, i Parëlinduri i çdo krijese,
është i Parëlinduri
i atyre që ngjallen prej të vdekurve.**

E falënderojmë Hyjin, *
Atin e Zotit tonë Jezu Krishtit,
sepse na bëri të aftë të kemi pjesë *
në trashëgimin e shenjtërve në dritë.

Ai na nxori nga pushteti i errësirës *

dhe na kaloi në Mbretërinë e Birit të vet të dashur,
në të cilin kemi shpërblimin *
- faljen e mëkateve.

Ai është shëmbëllesa e Hyjit të papashëm, *
i Parëlinduri - para çdo krijese.

Ai është para çdo gjëje *
dhe çdo gjë qëndron në Të.

Gjithçka u krijua nëpër Të dhe për Të *
në qiell e në dhe,
çka shihet e çka nuk shihet.

Ai është Kryet e Trupit - Kishës; *
Ai është Fillimi,
i Parëlinduri ndër të vdekurit *
- që të jetë në gjithçka i Pari.

Sepse Hyjit i pëlqeu
të banojë në Të e tërë Plotësia *
dhe, me anë të Tij, gjithçka të pajtohet me të.

Në saje të Gjakut të kryqit të Tij, †
Hyji vendosi paqen me krijesat e veta *
qoftë në tokë, qoftë në qiell.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 3 *I lindur para çdo krijese,
Krishti është mbret i gjithësisë.*

Leximi i shkurtër Vap 2, 38-39

Atëherë Pjetri tha: “Kthehuni dhe secili prej jush le të pagëzohet në emër të Jezu Krishtit që t’ju falen mëkatet e atëherë do ta merrni dhuratë - Shpirtin Shenjt. Sepse ky premtim u bë për ju, për fëmijët tuaj e për të gjithë ata prej së largu, të gjithë ata që Zotëria, Hyji ynë, do t’i thërrasë.”

Përgjigja e shkurtër

C Kam mëkatuar kundër teje: * më shëro, o Zot.
Kam mëkatuar kundër teje: më shëro, o Zot.

D Unë thërras: Ki mëshirë për mua,
më shëro, o Zot.

Lavdi Atit e Birit e Shpirtit Shenjt.
Kam mëkatuar kundër teje: më shëro, o Zot.

Kënga ungjillore (Magnificat)

Ant. *Ai që do t’i mbajë dhe do t’i mësojë ligjet e Zotit, do të jetë i madh në Mbretërinë e qiellit.*

Shpirti im e madhëron Zotin, *
shpirti im me hare i brohorit Hyjit, Shëlbuesit tim,
sepse shikoi me pëlqim mbi shërbëtoren e vet të përvujtë: *
qe se, që tani të gjitha breznitë do të më quajnë të lumtur,
sepse punë të mëdha bëri për mua Hyji i gjithpushtetshëm *
- i shenjtë është Emri i tij!

Mëshira e tij brezni më brezni *
për ata që e druajnë.

E tregoi fuqinë e krahut të vet: *
hodhi poshtë qëllimet e krenarëve,

i rrëzoi princat prej froneve të tyre *
i lartësoi të përvujtët.

Me të mira i mbushi ata që s’kishin ç’të hanë
të pasurit i nisi duarthatë.

I ndihmoi Izraelit, shërbëtorit të vet,
duke e sjellë në mend mëshirën

- si ua pati premtuar etërve tanë *
në të mirën e Abrahamit e të pasardhësve të tij në amshim.

Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen

Ant. *Ai që do t'i mbajë dhe do t'i mësojë ligjet e Zotit, do të jetë i madh në Mbretërinë e qiellit.*

Lutjet e besimtarëve

Ta madhërojmë dhe ta lavdërojmë Zotin e gjithëpushtetshëm. Ai di për çka ka nevojë populli i tij, mirëpo para së gjithash dëshiron të kujdesemi për Mbretërinë e tij. Prandaj t'i brohorisim:

Ardhtë mbretëria jote dhe drejtësia e saj

O Atë i mirë, Ti e ke dërguar Krishtin, Birin tënd, që të bëhet bari i mirë i shpirtit tanë, ndihmoju barinjve dhe popullit i cili iu është besuar, në mënyrë që populli të mos mbetet pa barinj

— dhe populli t'i dëgjojë barinjtë e vet.

Nxiti të krishterët që me dashuri vëllazërore t'iu ndihmojnë të sëmurëve

— dhe në këtë mënyrë t'i ndihmojnë vetë Birit tënd.

Bëj që edhe ata që ende nuk kanë besuar në Ungjillin tënd, të hyjnë në Kishën tënde

— dhe ta ndërtojnë gjithnjë dashurinë e ndërsjelltë.

Neve mëkatarëve na e jep hirin tënd me të cilin mund të kërkojmë ndjesë për mëkatet tona

— dhe të pajtohemi me Kishën tënde.

Bëj që të vdekurit të kalojnë në jetën e amshuar

— dhe të banojnë përherë me Ty.

Ati ynë, që je në qiell, u shenjtëroft emri yt. Ardhtë mbretëria jote, u bëftë vullnesa jote, si në qiell ashtu në tokë.

Bukën tonë të përditshme, na e jep sot, na i fal fajet tona si i falim ne fajtorët tanë, e mos na lër të biem në tundim, por na liro nga i Keqi. Amen.

Lutja

Bëj, po të lutemi, o Zot, që, të mësuar nga veprat pendestare, të Kreshmëve dhe të ushqyer me fjalën tënde, të jepemi me gjithë zemër pas dashurisë sate dhe të jemi gjithmonë të bashkuar në lutjen tënde. *Nëpër Zotin.*

PASMBRËMËSORJA E MËRKURË

V. Hyj, më eja në ndihmë!

P. O Zot, shpejto të më ndihmosh!

V. Lavdi Atit e Birit e Shpirtit Shenjt,

P. si ka qenë në fillim,

ashtu tash e përgjithmonë e jetës. Amen. (**K. P.** aleluja)

Në këtë moment është mirë të mbahet një moment qetësie për të bërë shqyrtimin e ndërgjegjes. Në kremtimet e bashkësive mund të përdoret apo të përshtatet një nga formulat e pendesës që përdoren gjatë meshës Ose

PUNA E PENDIMIT

O Zoti im, po më vjen keq me gjithë zemër për të gjitha mëkatet që i kam bërë. Se kam bjerrë parrizin dhe kam merituar ferrin. Por më fort se të kam fyer Ty, o E mira e pambaruar, që kaq fort më ke dashur. Mëshirë, o Zot! Më fal, o Zot! Po të jap fjalën, me ndihmën tënde, që mos të fyej më kurrë. Amen.

Himni: *njëri prej këtyre që vijon, sipas dëshirës*

HIMNI

Para fundit të dritës,
 ty duam, krijuesi i sendeve,
 me mirësinë e zakonit,
 të na kryesosh në roje.

Ty ëndëroftin zemrat tona,
 në gjumë të rëndë Ty ndjefshin,
 dhe gjithmonë lavdinë tënde
 këndofshin në ag të dritës.

Na jep jetë të shëndetshme,
 ngrohtësinë tonë përtërije,
 mjegullën e zezë të natës
 ta sqarojë drita jote.

Na jep, Atë fuqplotë,
 me anë t'Hyjit Jezu Krisht,
 që me ty në amshim
 mbretëron me Shpirtin Shenjt. Amen.

Ose:

O Krisht, që tërë shkëlqim e dritë
zbulon errësitë e natës,
e ndriçim drite qhesh
kur dritë u flet të lumëve.

O Hy i Shenjtë të lutemi
Ti në këtë natë na ruaj;
në ty të gjejmë pushimin,
na i bëj të qeta orët.

Nëse sytë i zë gjumi,
për ty zemra t'rijë zgjuar;
të mbrosh me dorën tënde
besnikët që të duan.

Shiko, o mbrojtësi ynë,
na ruaj ndër prita e kurthe,
sundo shërbëtorët tu
që me gjak tënd shpërbleve.

O Krisht, mbret shumë i drejtë,
Ty e Atit iu qoftë lavdia,
me Shpirtin Ngushëllimtar
ndër shekujt e përhershëm. Amen.

Ant. 1

*Ti, o Zot, je mburoja ime
dhe strehimi im.*

Psalmi 31 /30/ (2-6)

O Atë: në duart e tua po e dorëzoi shpirtin tim (Lk 23, 46).

Në ty, o Zot, shpresoj: †
mos lejo të turpërohem për amshim, *
më liro me drejtësinë tënde.

Prirë drejt meje veshin tënd, *
nxito të më shpëtosh!

Ji për mua qetë shpëtimi, *
kështjellë mbrojtjeje!

Sepse forca ime e strehimi im ti je: *
pashë Emrin tënd më pri e më sundo.
Më nxirr nga rrjeta që fshehtazi ma vunë, *
sepse ti je fuqia ime.

Në duar të tua po e porosis shpirtin tim, *
më shpërble, o Zot, Hyji besnik.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen

Ant. 1

*Ti, o Zot, je mburoja ime
dhe strehimi im.*

Ant. 2

Prej humnerës klitha tek ti, o Zot. †

Psalmi 130 /129/ (1-8) Nga thellësia ty të thërras

Ai do ta shëlbojë popullin e vet prej mëkateve të tija (Mt 1, 21).

Prej humnerës klitha tek ti, o Zot, *
† o Zot, dëgjoje britmën time!
Le ta dëgjojnë veshët e tu, *
zërin e lutjes sime.

Nëse do t'i mbash mend paudhësitë, o Zot, *
O Zot, e kush do të qëndrojë para teje?
Por tek ti gjendet falja *
që të dimë të të druajmë.

Shpresoj në ty, o Zot, *
shpirti im shpreson në premtimin e tij.
E pret shpirti im Zotin *
më tepër se rojtarët agimin.

Më tepër se rojtarët agimin *
le të shpresojë Izraeli në Zotin,
sepse te Zoti është mëshira *
dhe i madh është tek Ai shpërblimi.

Ai do ta nxjerrë Izraelin *
prej të gjitha paudhësive të tija.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 2

Prej humnerës klitha tek ti, o Zot.

Leximi i shkurtër Ef 4, 26-27. 31-32

Mos mëkaton! Dielli të mos perëndojë mbi hidhërimin tuaj! Mos i lini asnjë anë kah t'ju kapë djalli. Le të flaket larg jush çdo pikëllim, zemërim, hidhërim, britmë, sharje me çdo lloj ligësie. Përkundrazi, jini njëri për tjetrin të mirë, zemërdhimshëm; falni njëri-tjetrin sikurse edhe Hyji ju fali ju në Krishtin.

Përgjigjja e shkurtër

C O Zot, * në duart e tua po e dorëzoj shpirtin tim.
O Zot, në duart e tua po e dorëzoj shpirtin tim.

D O Hyj i së vërtetës, ti më ke shëlbuar:
në duart e tua po e dorëzoj shpirtin tim.

Lavdi Atit e Birit e Shpirtit Shenjt.
O Zot, në duart e tua po e dorëzoj shpirtin tim.

Ant. *Na shpëto, o Zot, derisa rrimë zgjuar;
na ruaj kur flemë: që të rrimë zgjuar me Krishtin
dhe të gjejmë prehje në paqe. (K. P. aleluja)*

Kënga e Simonit Lk 2, 29-32

Krishti, drita e popujve dhe lavdia e Izraelit.

Tani, o Zot, mund të lejosh të vdesë *
shërbëtori yt në paqe sikurse the ti vetë,

sepse me sytë e mi e pashë shëlbimin *
që ti e bëre gati në sy të të gjithë popujve:

Dritën që bën të njohin Ty paganët *
e që i jep nder popullit tënd, Izraelit.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. *Na shpëto, o Zot, derisa rrimë zgjuar;
na ruaj kur flemë: që të rrimë zgjuar me Krishtin
dhe të gjejmë prehje në paqe. (K. P. aleluja)*

Lutja

O Hyj i gjithëpushtetshëm dhe i amshuar, shikojë me mirësi ligëshitinë tonë, shtrije të djathtë e madhërisë sate dhe na mbro.
Nëpër Zotin tonë

Edhe kur Pasmbrëmësorja thuhet personalisht, vijon bekimi:

Zoti i gjithëpushtetshëm na dhuroftë një natë të qetë
dhe një mbarim të mirë.

C Amen.

Të falemi Mbretëreshë. Nëna e mëshirës, jeta, ëmbëlsimi e shpresa jonë, të falemi! Ty të thërrasim ne të shkretët, bijtë e Evës, që po fshajmë, po gjëmojmë e po qajmë në këtë shekull plot me lot. Deh pra, pajtorja jonë, ata sy të mëshirshëm të tu silli prej nesh! E Jezusin, të bekuarin, frytën e barkut tënd, pas kësaj shkretie na e kallxo. O e dhimbshmja, o e buta, o e ëmbla Virgjëra Mari! Amen.

Nën mbrojtjen tënde po ngasim, o shenjta Nëna e Hyjit, mos na i përbuz lutjet ndër nevoja tona, por, o virgjëra e lume dhe e bekuar, na shpëto përherë prej të gjithë rreziqesh, Zoja jonë, dhe ndërmjetëse e jona. Me Birin tënd na pajto, Birit tënd na porosit ndër duar të Birit tënd na lësho.

E ENJTE

FTESA

D O Zot, hapi buzët e mia.

C Dhe goja ime do të kumtojë lavdet e tua.

V. Lavdi Atit e Birit e Shpirtit Shenjt,
 P. *si ka qenë në fillim,*
ashtu tash e përgjithmonë e jetës. Amen.

Ant. Ejani, o popuj, ta adhurojmë Zotin,
Hyjin e vetëm e të vërtetë.

Ejani t'i këndojmë Zotit, *
 t'i brohorasim Hyjit, Shëlbuesit tonë.
 T'i dalim para me falënderje, *
 t'i këndojmë këngë hareje! *(Ant.)*

Sepse Hyj i madhërisëm është Zoti, *
 Mbret i madhërueshëm mbi të gjithë zotat!
 Sepse në dorën e tij janë thellësitë e tokës, *
 të tijat janë edhe majat e maleve,
 i tiji është deti - ai e krijoi, *
 duart e tija e formuan tokën. *(Ant.)*

Ejani ta adhurojmë, të biem përmbys para tij, *
 të biem në gjunjë para Zotit që na krijoi!
 Sepse ai është Hyji ynë,
 ne jemi populli i kullosës së tij, *
 grigja që ai ruan. *(Ant.)*

Oh sikur ta ndienit sot zërin e tij: *
 "Mos e bëni zemrën tuaj gur porsì në Meribë,
 porsì në ditë të Masës në shkretëtirë, †
 kur etërit tuaj më vunë në sprovë: *
 më provuan megjithëse i kishin parë veprat e mia. *(Ant.)*

Dyzet vjet më mërzi të ajo brezni †
 e thashë: 'Popull zemërluhatshëm është ky, *
 që s'i njuh udhët e mia.'

Prandaj u përбетova në hidhërimin tim: *
 'Askurrë s'do të hyjnë në prehjen time!'" *(Ant.)*

Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen. *(Ant.)*

SHËRBESA E LEXIMEVE

V. Hyj, më eja në ndihmë!
 P. *O Zot, shpejto të më ndihmosh!*

V. Lavdi Atit e Birit e Shpirtit Shenjt,
 P. *si ka qenë në fillim,*
ashtu tash e përgjithmonë e jetës. Amen.

Kjo hyrje nuk përdoret kur Shërbesa e lutjes fillon me Ftesë.

Himni

Nata e zezë mbulon ngjyrat
 e çdo sendi të tokës:
 duke u rrëfyer të lypim,
 gjyqtar i drejtë i zemrave,
 që të na shlyesh fajet
 t'na lajsh ndyrësinë e mendjes,
 e t'japësh, o Krisht, hirin
 e të na shporren krimet.

Nga prapësitë mpihet mendja,
 që e bren faji i damshëm;
 lakmon të çrranjosë t'errtat,
 të kërkojë ty, Shëlbues.

Dëbo tymin e mjegullën
 nga brenda sa më tepër,
 të gëzohet me u vendosur
 në dritën e uruar.

Ty, o Krisht, mbret gjithë i shenjtë,
 dhe Atit qoftë lavdia,

me Shpirtin Ngushllimtar
në shekujt e përjetshëm. Amen.

Kur Shërbesa e leximeve bëhet gjatë ditës:

Krisht, jepu shenjën, lutemi
shërbëtorëve tu që luten,
kjo mbrapështi e shekullit
të mos na robërojë fenë.

Mos të mendojmë pa mëshirë,
mos të smirojmë askënd,
të fyer mos t' marrim hak,
me të mirë ta mundim t' keqen.

Qoftë larg nga zemrat tona
mëri, mashtrim, kreni;
të marrë fund koprracia,
rranja e gjithë t' këqiave.

Të ruajë lidhjet e paqes
dashnia pa mashtrime;
pa njolla qoftë pastria
që vuan nga mizoria.

Ty, o Krisht, mbret gjithë i shenjtë,
dhe Atit qoftë lavdia,
me Shpirtin Ngushllimtar,
në shekujt e përjetshëm. Amen.

Ose një himn tjetër, apo një këngë e miratuar nga autoritetet kishtare.

Ant. 1 Shikoje, o Zot, përvuajtërimin e popullit tënd.

Psalmi 89 /88/ (39-53)

Ankimi mbi gërmadhat e shtëpisë së Davidit

E ngriti Shpëtimtarin tonë në shtëpinë e Davidit, shërbëtorit të vet (Lk 1, 69).

IV (39-46)

Por tani e flake dhe e përbuze, *
u zemërove kundër të shuguruarit tënd.
E prishe Besëlidhjen me shërbëtorin tënd, *
në lloj e hodhe kezën e tij.

I rrënove të tërë muret e tij, *
rrënoja të frikshme kështjellat e tij.
Pre po e bëjnë gjithsa udhës kalojnë, *
për të gjithë fqinjët u bë i neveritshëm.

E lartësove të djathtën e armiqve të tij, *
i gëzove të gjithë armiqtë e tij.
Tykë ia bëre tehun e shpatës së tij, *
e nuk deshe në luftë t' i jepje ndihmë.

I dhe fund shkëlqimit të tij, *
e përdhe fronin ia rrëzove.
Ia shkurtove ditët e rinisë, *
e mbulove me poshtërim e turp.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 1 Shikoje, o Zot, përvuajtërimin e popullit tënd.

Ant. 2 Krishti është filizi i rrënjës së Davidit,
ylli ndriçues i mëngjesit.

V (47-53)

Po deri kur, o Zot, do të fshihesh kështu, *
flakë do të ndizet hidhërimi yt?

Të të bjerë në mend sa e shkurtër është jeta ime! *
Vallë, thua kot i krijove njerëzit?

Kush i gjallë vdekjen s' do ta shohë, *

prej Nëntokës kush do të shpëtojë jetën?
Ku janë, Zot, mëshirat e dikurshme të tuat *
që me be ia premtove Davidit?

Të shërbëtorëve të tu, Zot, kujto çnderimin; *
në zemër e mbaj poshtërimin e paganëve,
që na bënë armiqtë e tu, o Zot, *
çnderojnë gjurmët e të shuguruarit tënd.

Qoftë bekuar Zoti për amshim. *
Amen! Amen!

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 2 *Krishti është filizi i rrënjës e Davidit,
ylli ndriçues i mëngjesit.*

Ant. 3 *Ditët tona kalojnë si bari:
por ti, o Zot, je përgjithmonë.*

Psalmi 90 /89/ (1-17) Mirësia e Zotit qoftë mbi ne

Te Zoti një ditë është si një mijë vjet, po edhe një mijë vjet janë si një ditë e vetme (2 Pjt 3, 8).

O Zot, ti u bërë strehimi ynë *
nga breznia në brezni.

Para se të lindnin malet, †
para se të bëhej toka dhe rruzulli, *
prej amshimit të amshimit ti je Hyj!

Ti e kthen njeriun në pluhur duke thënë: *
»Kthehuni, bijtë e Adamit!«

Sepse mijëra vjet për sy të tu †
janë si dita e djeshme që kaloi, *
porsi ndërresa e rojës së natës!

Ti i zhbini në gjasim të gjumit *
që në mëngjes kalon si bari;
lulëzon në mëngjes edhe gjelbëron, *
në mbrëmje korret edhe vyshket!

Sepse na shkatërroi felgrimi yt, *
na tmerroi furia e zemërimit tënd.
Para vetes i vure fajet tona, *
të fshehtat tona në dritë të fytyrës sate.

Ditët na shkuan në hidhërimin tënd, *
si një ofshamë mbaruan vitet tona.
Jeta jonë zgjat shtatëdhjetë vjet, *
po qemë të shëndoshë edhe tetëdhjetë,
por shumica me mundim e dhembje, *
kalojnë shpejt e ne prej këndeje fluturojmë.

Kush ia di fuqinë zemërimit tënd, *
felgrimin tënd siç e lyp frika jote?

Na mëso ashtu t' i njehim ditët tona *
që zemra jonë dijen ta mbërrijë.

Kthehu, o Zot! Deri kur kështu? *
Deh, ki mëshirë për shërbëtorët e tu!
Na e diko në mëngjes mëshirën tënde *
e do të gëzohemi e do të galdojmë
të gjitha ditët e jetës sonë.

Gëzoni për ditët që na mundove, *
për vjetët që i kaluam në mjerim.
Vepra jote të shfaqet në shërbëtorë të tu, *
shkëlqimi yt mbi bijtë e tyre!

Rëntë mbi ne mirësia e Zotit, Hyjit tonë, †
bëj të shkojë mbarë vepra e duarve tona, *
të përparojë vepra e duarve tona.

Lavdi Atit e Birit *

e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 3 *Ditët tona kalojnë si bari:
por ti, o Zot, je përgjithmonë.*

D Në ty, o Zot, është burimi i jetës;
C në dritën tënde ne e shohim dritën.

LAVDET E MËNGJESIT

V. Hyj, më eja në ndihmë!

P. O Zot, shpejto të më ndihmosh!

V. Lavdi Atit e Birit e Shpirtit Shenjt,

P. si ka qenë në fillim,

ashtu tash e përgjithmonë e jetës. Amen.

Kjo hyrje nuk përdoret kur Shërbesa e lutjes fillon me Ftesë.

Himni

Ja po lind dielli i zjarrtë:
ka zor, ka turp, pendohet,
askush n' dëshmi të dritës
s' mund të mëkatojë paprerë.

Verbësia qet kokëqarje,
pse ne kokëposhtë rrëzuar
nga hapa ogurzezë
na hedh n' greminë t' gabimeve.

Kjo dritë na sjellte kohë t' mirë,
na bëftë për vete t' pastër,
mos t' themi asgjë gënjeshtare
në errësirë mos u kthefshim.

Kështu kalofte tërë dita,
as gjuha e rreme, as dora
ja sytë e shpejtë mëkat mos bëfshin,
as faji trupin mos na njolloftë.

Vëzhguesi qëndron sipër,
që çdo ditë prej së largu
kundron ne e veprat tona
nga agu i dritës gjer në t'errun.

Atit Hy i qoftë lavdia
dhe Birit tij të vetëm,
me Shpirtin Ngushllimtar,
në shekujt e përjetshëm. Amen.

Ose një himn tjetër, apo një këngë e miratuar nga autoritetet kishtare.

Ant. 1 *Gjëra të mrekullueshme fliten për ty,
o Qytet i Hyjit.*

Psalmi 87 /86/ (1-7) *Jerusalemi, nëna e të gjithë popujve*

Jerusalemi - ai lart - është i lirë, ai është Nëna jonë (Gal 4, 26).

Themelet e tij janë mbi malet e shenjta, †

Zoti i do më shumë dyert e Sionit *

se të gjitha banesat e Jakobit.

Gjëra të mrekullueshme fliten për ty, *

o Qyteti i Hyjit!

»Po përmend Rahabin e Babiloninë

ndër ato që më njohin; †

ja, Filisteja, Tiri e Etiopia *

- edhe ato lindën atje.«

Për Sionin do të thuhet: »Të gjithë në të lindën, *

sepse e forcoi vetë i Tejetlarti!«

Zoti do të shkruajë në librin e popujve: *

»Këta lindën atje!«

Dhe duke hequr valle do të këndojnë: *

»Të gjitha burimet e mia janë në ty!«

Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen.

Ant. 1 *Gjëra të mrekullueshme fliten për ty,
 o Qytet i Hyjit.*

Ant. 2 *Ja, po vjen Zoti me fuqi,
 me të është shpërblimi i tij.*

Kënga Is 40, 10-17

Bariu i mirë: Hyji i Tejetlarti dhe i Gjithëdijshmi

Ja, unë po vij për së shpejti! Edhe shpërblimi im me mua (Zb 22, 12).

Qe, Zoti, Hyji juaj, po vjen me fuqi, *
 zotëron krahu i tij:

ja, me të është shpagimi i tij, *
 e para tij shpërblimi i tij!

Si bariu e kullot grigjën e vet, *
 në dorë i merr qengjat,
 ngrykë i mbart, *
 i këqyr me kujdes pëllezat.«

Kush me grusht e ka matur ujët e detit *
 e me pëllëmbë përmasat e qiellit?

Kush e mati me babune pluhurin e tokës, †
 e i peshoi me peshore malet *
 dhe me kandar kodrat?

Kush e drejtoi shpirtin e Hyjit? *
 Ose si këshilltar i ka dhënë këshilla?

Me kë u këshillua dhe e mësoi atë, *
 ia mësoi udhën e drejtësisë,
 e thelloi atë në urtësi, *
 ia tregoi udhën e dijes?

Ja, popujt janë një pikë uji të kovës, †
 çmohen si një kokërr pluhur në peshore, *
 sa një kokërr pluhuri peshojnë ishujt.

Libani është i vogël për turrë të druve, *
 fli shkumbimi s'dalin kafshët e tija.

Asgjë s'janë para Tij të gjithë popujt, *
 për asgjë e tytësi Ai i mban.

Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen.

Ant. 2 *Ja, po vjen Zoti me fuqi,
 me të është shpërblimi i tij.*

Ant. 3 *Lartësojeni Zotin, Hyjin tonë,
 bini përmbys para tij.*

Psalmi 99 /98/ (1-9) Shenjt është Zoti, Hyji ynë

Ti je përmbi kerubinjt, ti që e shndërrove gjendjen e mjerueshme të botës kur u bërë si ne (Shën Atanasi).

Zoti mbretëron! Le të dridhen popujt! *
 Rri mbi kerubinë, le të trandët Toka!
 I madh është Zoti në Sion, *
 i madhërueshëm mbi të gjithë popujt.

Le ta lavdërojnë Emrin tënd të madh e të tmerrshëm, *
 sepse është i shenjtë.

Mbreti i pushtetshëm e do të drejtën: †
 ti ke caktuar ç'është e drejtë, *
 gjyq e drejtësi ti i ushtron në Jakobin.

Lartësojeni Zotin, Hyjin tonë, †

bini përmbys para shtrojës së këmbëve të tij, *
sepse është i shenjtë.

Moisiu e Aroni ndër priftërinjtë e tij, †
Samueli ndër ata që e thërrasin Emrin e tij: *
e thërrisin në ndihmë dhe Zoti i dëgjonte.

Nga shtylla e resë fliste me ta: †
i dëgjonin urdhërimet e tij *
edhe Ligjet që ua kishte dhënë.

O Zot, Hyji ynë, ti i dëgjoje ata, †
O Hyj, ti me ta ishe i durueshëm, *
edhe pse i ndëshkoje fajet e tyre.

Madhërojeni Zotin, Hyjin tonë, †
adhuroni në malin e tij të shenjtë, *
sepse i shenjtë është Zoti, Hyji ynë.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 3 *Lartësojeni Zotin, Hyjin tonë,
bini përmbys para tij.*

Leximi i shkurtër 1 Pjt 4, 10-11

Shërbeni njëri-tjetrit, secili sipas dhoratës që keni marrë: si mbarështues të mirë të hirit të shumëllojshëm të Hyjit. Kush flet, le të flasë për të shpallur fjalën e Hyjit. Nëse ndokush ka dhoratën e shërimit, le ta bëjë me fuqi që i jep Hyji, që në gjithçka t'i jepet lavdi Hyjit nëpër Jezu Krishtin, të cilit i qoftë lavdi e pushtet në shekuj të shekujve. Amen.

Përgjigja e shkurtër

C Me gjithë zemër të kërkoj: * m'u përgjigj, o Zot.
Me gjithë zemër të kërkoj: m'u përgjigj, o Zot.

D Do ta ruaj fjalën tënde:
m'u përgjigj, o Zot.

Lavdi Atit e Birit e Shpirtit Shenjt.
Me gjithë zemër të kërkoj: m'u përgjigj, o Zot.

Kënga ungjillore (Benedictus)

Ant. *T'i shërbejmë Zotit në shenjtëri e drejtësi
ai do të na shpëtojë prej armiqve tanë.*

Qoftë bekuar Zoti, Hyji i Izraelit, *
që e pa dhe e shpërbleu popullin e vet!

Ai e ngriti Shpëtimtarin tonë *
në shtëpinë e Davidit, shërbëtorit të vet,

sikurse premtoi kaherë *
me gojë të profetëve të tij të shenjtë:

se do të na shpëtojë prej armiqve tanë *
dhe prej dorës së të gjithë atyre që na urrejnë;

se do të bëjë mirësinë që ua premtoi etërve tanë *
e do t'i bjerë në mend Besëlidhja e tij e shenjtë

e betimi që bëri në të mirën e Abrahamit, atit tonë *
se do të na e bëjë të mundshme t'i shërbejmë pa frikë,

të çliruar nga duart e armikut *
në shenjtëri e drejtësi para tij
për çdo ditë të jetës sonë.

E ti, o djalosh, do të quhesh profet i të Tejetlartit, *
sepse do të shkosh përpara Zotit
për t'ia përgatitur udhët,

për ta vënë në dijeni popullin e tij *
se Hyji do ta shëlbojë duke ia falur mëkatet e tija,

në saje të zemrës së dashur të Hyjit tonë *
që do të na e dërgojë në pasi prej qiellit Diellin,

për të shndërritur ata që gjenden në errësi
dhe në hijen e vdekjes, *

për t'i drejtuar hapat tanë në udhën e paqes.“

Lavdi Atit e Birit *

e Shpirtit Shenjt,
si ka qenë në fillim, *

ashtu tash e përgjithmonë e jetës. Amen

Ant. *T'i shërbejmë Zotit në shenjtëri e drejtësi
ai do të na shpëtojë prej armiqve tanë.*

Lutjet e besimtarëve

T'i japim lavdi Zotit, i cili me dashuri e udhëheq popullin e vet dhe e ushqen; me gëzim t'i brohorasim:

Lavdi ty, o Zot, në shekuj të shekujve!

Atë i mirë, të bekojmë për dashurinë tënde:

— që shkëlqen në krijim, por edhe më tepër në shëlbim.

Në fillim të kësaj dite na e mbush zemrën me dëshirë për të të shërbyer ty:

— mendimet dhe veprat tona pandërprerë le ta lavdërojnë Emrin tënd.

Pastroji zemrat tona prej çdo dëshire të keqe:

— që të jemi besnikë ndaj vullnetit tënd.

Hapi sytë tanë që t'i shohim vuajtjet e vëllezërve tanë,

— dhe t'i ndihmojmë me dashuri.

Ati ynë, që je në qiell, u shenjtëroft emri yt. Ardhtë mbretëria jote, u bëftë vullnesa jote, si në qiell ashtu në tokë.

Bukën tonë të përditshme, na e jep sot, na i fal fajet tona si i falim ne fajtorët tanë, e mos na lër të biem në tundim, por na liro nga i Keqi. Amen.

Lutja

O Hyj i gjithëpushtetshëm dhe i amshuar, shtojë në ne fenë, shpresën e dashurinë dhe që të fitojmë çka na premtan, bëj që të duam çka na urdhëron. *Nëpër Zotin.*

ORA E MESME

E Tretë – e gjashtë – e nëntë

V. Hyj, më eja në ndihmë!

P. *O Zot, shpejto të më ndihmosh!*

V. Lavdi Atit e Birit e Shpirtit Shenjt,

P. *si ka qenë në fillim,
ashtu tash e përgjithmonë e jetës. Amen.*

Pason himni i përshtatshëm.

HIMNI

Ora e tretë

Himni

Tani neve, o Shpirti i Shenjtë,
një me Atin e Birin,
denjohu i gatshëm t'futesh
i reshur n'parzëm tonë.

Gojë, gjuhë, mendje, forcë, shqisë
të ushtojnë duke rrëfyer,
me zjarr t'flakrojnë dashtënia,
nxehësia t'i ngrohë shokët.

Nëpër ty t'kuptojmë Atin,
të njohim edhe Birin,
ty Shpirtin e të dyve
t'besojmë në gjitha kohët. Amen.

Ora e gjashtë

Himni

Mbret i fortë, Hyj i vërtetë,
që sundon të gjitha sendet,
me ndriçim pajis mëngjesin
dhe me zjarr shkëlqen mesditën.

Shuaji flakët e shamatave,
flake zjarrin e dëmprurësve,
jepu trupave shërimin,
dhe t'vërtetën paqe zemrave.

Bëj, o Atë tërë drejtësi,
dhe ti Bir baras si Ati,
bashkë me Shpirtin Ngushëllimtar
që mbretëroni ndër gjithë shekujt. Amen.

Ora e nëntë

Himni

Hyj i gjithësisë, fuqi e qëndrueshme,
i patrandur në ty mbaresh,
kohët e dritës së përditshme
përcakton me shumë mbarësi.

Dhe gjatë netëve lësho dritën,
që jeta të mos ndërpritet,
por çmimi i vdekjes shenjte
të jetë lavdia e përrjetshme.

Bëj, o Atë tërë drejtësi,
dhe, o Bir, baras si Ati,
bashkë me Shpirtin Ngushëllimtar,
të mbretëroni ndër gjithë shekujt. Amen.

Ant. 1 *Më përkrah si më përmtove, o Zot, e do te jetoj.*

Psalmi 119 /118/ XV (113-120)

I urrej ata që janë si mësalla me dy faqe *
dhe e dua Ligjin tënd.

Përkrenarja dhe shqyti im je ti, *
kam besim të plotë në fjalën tënde.

M'u hiqni sysh, o keqbërës, *
se dua t'i zbatoj urdhërimet e Hyjit tim!

Më përkrah si më përmtove e do të jetoj *
dhe mos më tradhtoftë shpresa ime.

Më përkrah e do të shpëtoj, *
do të kënaqem vazhdimisht në rregulloret e tua.
Ti i urren ata që u shmangen urdhërimeve të tua, *
sepse mendimi i tyre është gënjeshtër.

Porsi ndryshkun ti i zhin nga faqja e dheut keqbërësit, *
prandaj unë i dua dëshmitë e tua.

Trupi im më dridhet prej frikës sate, *
sepse i kam frikë gjyqet e tua.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 1 *Më përkrah si më përmtove, o Zot, e do te jetoj.*

Ant. 2 *Na ndihmo, o Hyj, Shëlbuesi ynë,
dhe na i fal fajet tona.*

Psalmi 79 /78/ (1-5. 8-11. 13)

Vajtëm për shkatërrimin e Jerusalemit

O po ta kuptoje edhe ti në këtë ditë çka ta sjell ty paqen!... S'kanë për të lënë në ty as gur mbi gur, sepse nuk e bëre për send kohën kur Hyji e rdhi të ndihmojë (Lk 19, 42. 44).

O Hyj, e pushtuan paganët pronën tënde, †
e dhunuan Tempullin tënd të shenjtë, *
Jerusalemin e bënë një grumbull rrënojash!

Ua dhanë kufomat e shërbëtorëve të tu †
për ushqim shpendëve të qiellit, *
mishin e shenjtërve të tu bishave të malit.

Gjakun e tyre e derdhën si ujë *
përreth Jerusalemit e s'kishte kush t'i varroste!

U bëmë çnderim ndër sy të fqinjëve tanë, *
përqeshje e lojë për ata që i kemi përreth.

Po deri kur, o Zot? A do të rrish përgjithmonë i hidhëruar? *

Do të digjet si zjarri zemërimi yt?

Mos i kujto fajet e etërve tanë, †
le të na vijë në ndihmë sa më parë mëshira jote, *
sepse jemi bërë tepër të mjerë.

Na ndihmo, o Hyj, Shëlbuesi ynë, †
për nder të Emrit tënd e na çliro: *
pashë nderin e Emrit tënd na i fal fajet!

Pse të thonë paganët: »Ku është Hyji i tyre?« †
Le ta pranojnë ndër sy tanë paganët *
hakmarrjen e gjakut të derdhur të shërbëtorëve të t'u.

Le të arrijë tek ti gjëma e të robëruarve, †
me fuqinë e krahut tënd *
shpëtoji të dënuarit me vdekje.

E ne, populli yt - delet e kullotës sate, †
do të të lavdërojmë për amshim, *
do ta shpallim nga brezi në brez lavdinë tënde.

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 2 *Na ndihmo, o Hyj, Shëlbuesi ynë,
dhe na i fal fajet tona.*

Ant. 3 *Shiko nga qielli, o Hyj i gjithësisë,
eja dhe shihe vreshtin që vetë e mbolle.*

Psalmi 80 /79/ (2-20) Shikoje, o Zot, vreshtin tënd

Eja, o Zot, Jezus! (Zb 22, 20).

Dëgjo ti, o Bariu i Izraelit, *
ti që i prin Jozefit si grigjës,
ti, që rri në fron mbi kerubinë, shkëlqë *
para Efraimit, Beniaminit e Manaseut:
zgjyje pushtetin tënd dhe eja në ndihmë *
për të na shpëtuar!

O Hyj, deh, na përtërij, *
kthjelle fytyrën tënde e na shëlbo!

O Zot, Hyji i ushtrive, deri kur do të hidhërohesh *
në lutjen e popullit tënd?

Deri kur do të na ushqesh me bukë lotësh, *
e do të na japësh të pimë ujë lotësh me shumicë?
Na bëre shkak grindjeje për fqinjët tanë *
e armiqtë tanë po qeshen me ne.

O Hyj i ushtrive, deh, na përtërij, *
kthjelle fytyrën tënde e na shëlbo!

Vreshtin nga Egjipti e nxore *
e, për ta mbjellë atë, paganët i dëbove.

Tokën ia përgatite, *
lëshoi rrënjë dhe e mbushi tokën.

U mbuluan malet me hijen e tij, *
me gema të hardhisë u mbushën cedrat e Hyjit,
pinjollët e tij arritën deri në det, *
shermendet i qiti deri në Lumë.

Gardhin pse ia theve *
që ta vjelë çdo kalimtar?

E dëmtoi derri i egër, *
e kulloti çdo egërsirë.

Kthehu, Hyji i ushtrive, †
shikoje nga qielli e shihe, *
eja, shihe këtë vresht,
dili zot se ti vetë e mbolle: *
djalit që për vete e rrite.

Ata që e dogjën dhe e prenë *
le të sharrojnë prej kërcënimit të fytyrës sate.

Dora jote qoftë mbi njeriun e së djathtës sate, *
mbi birin e njeriut që për vete e rrite.

Kurrë më nuk do të largohemi prej teje: *
na përtërij e do ta thërrasim Emrin tënd.

O Zot, Hyji i ushtrive, deh ti, na përtërij, *
kthjelle fytyrën tënde e na shpëto!

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 3 *Shiko nga qielli, o Hyj i gjithësisë,
eja dhe shihe vreshtin që vetë e mbolle.*

Ora e tretë

Leximi i shkurtër *Urt 19, 22*

Në të gjitha mënyrat, o Zot, e madhërove, e nderove e nuk e përbuze popullin tënd, por iu gjete në ndihmë në çdo kohë e në çdo vend.

- D** Përtëriji, o Hyj, veprat e tua,
C *shfaqe fuqinë tënde ndër paganë.*

Lutja

O Hyj, ti që në orën e tretë e ndikove Shpirtin Shenjt përmbi apostujt e bashkuar në lutje, bëj që edhe ne të bëhemi pjesëtarë të këtij hiri. *Nëpër Krishtin, Zotin tonë.*

Ora e gjashtë

Leximi i shkurtër *Krh. Lp 4, 7*

E njëmend, ku gjendet një popull tjetër aq i madhërueshëm, që t'i ketë hyjnitë e veta kaq afër vetes, sikurse është pranë nesh në të gjitha kërkesat tona Zoti, Hyji ynë?!

- D** Zoti është afër atyre që e thërrasin;
C *ai e dëgjon britmën e tyre.*

Lutja

O Hyj i gjithëpushtetshëm dhe i amshuar, në të cilin nuk ka errësirë as terr, le të shkëlqejë përmbi ne drita jote, që, të shndritur prej fjalës sate, të ecim drejt teje me zemër bujare dhe besnike. *Nëpër Krishtin Zotin tonë.*

Ora e nëntë

Leximi i shkurtër *Es 10, 3f.*

Populli im Izraeli, janë ata që e thirrën në ndihmë Zotin. Dhe Zoti e shpëtoi popullin e vet dhe na shpëtoi ne nga të gjitha të këqijat dhe bëri shenja të mëdha e mrekulli, që nuk janë bërë kurrë ndër paganë.

- D** Të lavdëroj, o Zot: ti e dëgjove lutjen time,
C *ti je shëlbimi im.*

Lutja

Dëgjoji, o Zot, lutjet tona dhe bëj që të bashkohemi me mundimet e Birit tënd që me qëndrueshmëri ta bartim kryqin tonë të përditshëm. *Nëpër Krishtin, Zotin tonë.*

Përfundimi i Orës, sikurse në Shërbesën e rëndomtë.

MBRËMËSORJA

V. Hyj, më eja në ndihmë!

P. *O Zot, shpejto të më ndihmosh!*

V. Lavdi Atit e Birit e Shpirtit Shenjt,

P. *si ka qenë në fillim,
ashtu tash e përgjithmonë e jetës. Amen.*

Himni

Hyj i fuqisë së madhe,
qeniet lindur nga ujrat
pjesërisht ktheve në vorbull,
pjesërisht nxore në ajër.

N'ujë duke lënë të zhyturat

nën qiell duke vendosë të nxjerrat,
që, nga një trung të dala,
të mbushin vende t'ndryshme.

Dhuroju të gjithë sklleverve,
që i pastron vala e gjakut,
t'mos dijnë gabime krimesh,
mos të mbajnë mërzi vdekjeje.

Që askënd mos të mposhtë faji,
askënd mos t'prishë vetëmburrja,
mos të bjerë mendja e çartur,
mos ta rrëzojë mendja e madhe.

Bëj, o Atë tërë i shenjt,
dhe, o Bir, baras me Atin
me Shpirtin Ngushllimtar,
sundues për gjithë shekujt. Amen.

Ose një himn tjetër, apo një këngë e miratuar nga autoritetet kishtarë.

Ant. 1 *Tek dera e shtëpisë sate, o Zot,
shërbëtorët e tu brohorasin me galdim.*

Psalmi 132 /131/ I (1-10) Premtimet që Zoti i bëri Davidit

Zoti Hyj do t'ia japë fronin e Davidit, atit të tij (Lk 1, 32).

Të të bjerë në mend, o Zot, Davidi *
e gjithë mirësia e tij,
si iu përbetua Zotit, *

si iu kushtua të Pushtetshmit të Jakobit:

»Nuk do të hyj nën pullazin e banesës sime, *
nuk do të bie në shtrorjen e shtratit tim,
nuk do t'u jap gjumë syve të mi, *
s'do t'i lë të koten qepallat e mia,

pa e pasë gjetur një vend për Zotin, *
një banesë për të Pushtetshmin e Jakobit.«

Ja, dëgjuam se është në Efratë, *
e kemi gjetur në Fushat e Jaarit!

Le të hymë në tendën e tij, *
të adhurojmë te shtroja e këmbëve të tij!

Ngrihu, o Zot, eja në vendin e pushimit tënd, *
ti dhe arka e Pushtetit tënd!

Priftërinjtë e tu le të veshen me drejtësi, *
shenjtërit e tu le të brohorisin me galdim.

Për dashuri të shërbëtorit tënd Davidit, *
mos e përbuz fytyrën e Mesisë tënd!

Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen.

Ant. 1 *Tek dera e shtëpisë sate, o Zot,
shërbëtorët e tu brohorasin me galdim.*

Ant. 2 *Zoti e zgjodhi Sionin për banesë të vetën.*

Psalmi 132 /131/ II (11-18)
Zgjedhja e Davidit dhe e Sionit

Tashti këto premtime i janë bërë Abrahamit e Pasardhësit të tij... që do të thotë Krishtit (Gal 3, 16).

Zoti iu përbetua Davidit për të vërtetën, *
asses si s'do ta shkelë fjalën e dhënë:

»Bamin e kraharorit tënd *
do ta vë mbi fronin tënd!

Nëse bijtë e tu do ta ruajnë Besëlidhjen time *
dhe dëshmitë e mia që do t'ua mësoj,
po edhe bijtë e tyre përgjithmonë *
do të rrinë përmbi fronin tënd.«

Sepse Zoti e zgjodhi Sionin, *

e pëlqeu për banesë të veten:
 »Ky do të jetë vendi i pushimit tim përjetë, *
 këtu do të banoj sepse vetë e dëshirove.
 Do t'i bekoj e do t'i ribekoj prodhimet e tij, *
 skamnorët e tij do t'i ngij me bukë.
 Priftërinjtë e tij do t'i vesh me shëlbim, *
 shenjtërit e tij do të brohorasin me galdim.
 Atje do të bëj t'i ngallitë Pinjolli Davidit, *
 do ta përgatis dritëzën për të shuguruarin tim.
 Armiqtë e tij do t'i vesh me turp, *
 kurse mbi kokën e tij do të shkëlqejë kurora e tij!«
 Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen.

Ant. 2 *Zoti e zgjodhi Sionin për banesë të vetën.*

Ant. 3 *Të gjithë popujt do të vijnë
 në shtëpinë tënde, o Zot,
 do ta adhurojnë Emrin tënd të shenjtë.*

Kënga Krh. Zb 11, 17-18; 12, 10b-12a Gjyqi i Zotit

Po të falënderojmë, o Zotëri,
 Hyj i Gjithëpushtetshëm, *
 ty që je, ty që ishe,
 sepse e ushtrove fuqinë tënde të madhe *
 dhe e more mbretërimin!
 Paganët u hidhëruan, †
 por arriti zemërimi yt! *
 Erdhi koha të gjykohen të vdekurit,
 koha e shpërblimit për shërbëtorët e tu *
 profetët dhe shenjtërit
 dhe për të gjithë ata që e druajnë Emrin tënd *
 - për të vegjël e të mëdhenj.
 Ja, tani koha e shëlbimit, †
 e pushtetit dhe e Mbretërisë së Hyjit tonë *
 dhe e sundimit të Krishtit të tij!
 Sepse u hodh poshtë paditësi i vëllezërve tanë *
 që ditë e natë i padiste para Hyjit tonë.
 Por ata e mundën në fuqi të gjakut të Qengjit †
 dhe në saje të dëshmisë së vet: *
 nuk e deshën jetën e vet aq sa ta dronin vdekjen.
 Prandaj galdo, o qiell, *
 galdoni edhe ju, o qiellorë të gjithë!
 Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen.

Ant. 3 *Të gjithë popujt do të vijnë
 në shtëpinë tënde, o Zot,
 do ta adhurojnë Emrin tënd të shenjtë.*

Leximi i shkurtër 1 Pjt 3, 8-9

Jini të gjithë një mendimi, të dhimbshëm, plot dashuri vëllazërore, të mëshirshëm, të përvujtë. Mos e ktheni të keqen me të keqe, as fyerjen me fyerje! Por përkundrazi, bekonit, sepse për këtë edhe u grishët: që të trashëgoni bekimin.

Përgjigja e shkurtër

C Ti na ushqen, o Zot, * me më të mirin grurë.
Ti na ushqen, o Zot, me më të mirin grurë.
D Na ngin me mjaltë të nxjerrë nga shkëmbi,

me më të mirin grurë.
Lavdi Atit e Birit e Shpirtit Shenjt.
Ti na ushqen, o Zot, me më të mirin grurë.

Kënga ungjillore (Magnificat)

Ant. Zoti i rrëzoi princat prej froneve të tyre,
e i lartësoi të përvuajturit.

Shpirti im e madhëron Zotin, *
shpirti im me hare i brohorit Hyjit, Shëlbuesit tim,
sepse shikoi me pëlqim mbi shërbëtoren e vet të përvujtë: *
që se, që tani të gjitha breznitë do të më quajnë të lumtur,
sepse punë të mëdha bëri për mua Hyji i gjithpushtetshëm *
- i shenjtë është Emri i tij!
Mëshira e tij brezni më brezni *
për ata që e druajnë.
E tregoi fuqinë e krahut të vet: *
hodhi poshtë qëllimet e krenarëve,
i rrëzoi princat prej froneve të tyre *
i lartësoi të përvujtët.
Me të mira i mbushi ata që s'kishin ç'të hanë
të pasurit i nisi duarthatë.
I ndihmoi Izraelit, shërbëtorit të vet,
duke e sjellë në mend mëshirën
- si ua pati premtuar etërve tanë *
në të mirën e Abrahamit e të pasardhësve të tij në amshim.
Lavdi Atit e Birit *
e Shpirtit Shenjt,
si ka qenë në fillim, *
ashtu tash e përgjithmonë e jetës. Amen

Ant. Zoti i rrëzoi princat prej froneve të tyre,
e i lartësoi të përvuajturit

Lutjet e besimtarëve

Përshpirtërisht t'i lutemi Krishtit, Bariut dhe Ngushëlluesit të popullit të vet:

O Zot, strehimi ynë, dëgjoje lutjen tonë!

Bekuar qofsh, o Zot, që na bërë pjesëtarë të familjes sate:
— bëj që gjithmonë të jemi gjymtyrë të gjalla të Kishës së shenjtë.
Kujdesin për të gjitha Kishat, ia besove Papës tonë **E**.:
— jepi fenë e palëkundshme, shpresën e gjallë, dashurinë e përkryer.
Mëkatarëve jepu forcë që të kthehen:
— të gjithëve jepu paqe dhe shëlbim.
Ti e përjetove mërgimin:
— le të të bjerë ndër mend për të gjithë ata që jetojnë larg familjes dhe shtëpisë së vet.
Të gjithë të vdekurve që shpresuan në Ty:
— jepu pushimin e pasosur.

Ati ynë, që je në qiell, u shenjtëroft emri yt. Ardhë mbretëria jote, u bëftë vullnesa jote, si në qiell ashtu në tokë.
Bukën tonë të përditshme, na e jep sot, na i fal fajet tona si i falim ne fajtorët tanë, e mos na lër të biem në tundim, por na liro nga i Keqi. Amen.

Lutja

O Hyj i gjithëpushtetshëm dhe i amshuar, prej teje kemi guximi të të thërrasim 'Atë', përforcoje në ne shpirtin e bijësisë hyjnore, që të meritojmë të hyjmë në trashëgimin e premtuar. *Nëpër Zotin.*

PASMBRËMËSORJA
E ENJTE

V. Hyj, më eja në ndihmë!
P. O Zot, shpejto të më ndihmosh!
V. Lavdi Atit e Birit e Shpirtit Shenjt,
P. si ka qenë në fillim,
ashtu tash e përgjithmonë e jetës. Amen. (**K. P.** aleluja)

Në këtë moment është mirë të mbahet një moment qetësie për të bërë shqyrtimin e ndërgjegjes. Në krenrimet e bashkësive mund të përdoret apo të përshtatet një nga formulat e pendesës që përdoren gjatë meshës. Ose

PUNA E PENDIMIT

O Zoti im, po më vjen keq me gjithë zemër për të gjitha mëkatet që i kam bërë. Se kam bjerrë parrizin dhe kam merituar ferrin. Por më fort se të kam fyer Ty, o E mira e pambaruar, që kaq fort më ke dashur. Mëshirë, o Zot! Më fal, o Zot! Po të jap fjalën, me ndihmën tënde, që mos të fyej më kurrë. Amen.

Himni: njëri prej këtyre që vijon, sipas dëshirës

Para fundit të dritës,
ty duam, krijuesi i sendeve,
me mirësinë e zakonit,
të na kryesosh në roje.

Ty ëndëroshin zemrat tona,
në gjumë të rëndë Ty ndjefshin,
dhe gjithmonë lavdinë tënde
këndofshin në ag të dritës.

Na jep jetë të shëndetshme,
ngrohtësinë tonë përtërije,
mjegullën e zezë të natës
ta sqarojë drita jote.

Na jep, Atë fuqplotë,
me anë t'Hyjit Jezu Krisht,
që me ty në amshim
mbretëron me Shpirtin Shenjt. Amen.

Ose:

O Krisht, që tërë shkëlqim e dritë
zbulon errësitë e natës,
e ndriçim drite quhesh
kur dritë u flet të lumëve.

O Hy i Shenjtë të lutemi
Ti në këtë natë na ruaj;
në ty të gjejmë pushimin,
na i bëj të qeta orët.

Nëse sytë i zë gjumi,
për ty zemra t'rrijë zgjuar;
të mbrosh me dorën tënde
besnikët që të duan.

Shiko, o mbrojtësi ynë,
na ruaj ndër prita e kurthe,
sundo shërbëtorët tu
që me gjak tënd shpërbleve.

O Krisht, mbret shumë i drejtë,
Ty e Atit iu qoftë lavdia,
me Shpirtin Ngushëllimtar
ndër shekujt e përhershëm. Amen.

Ant. 1

*Në dorën tënde është fati im, o Zot,
mbarë trupi im pushon në qetësi.*

Psalmi 16/15/ (1-11) Zoti pjesa e trashëgimit tim

Hyji e ngjalli Jezusin, duke e shpëtuar nga tmëri i vdekjes (Vap 2, 24).

Më ruaj, o Hyj, *

sepse të kam rënë ndore!

I thashë Zotit: »Ti je Zoti im, *

tjetër të mirë nuk kam veç teje!«

Për shenjtërit që janë përmbi tokë, njerëz bujarë, *

po përvëlohem krejtësisht prej dëshirës!

I shumojnë të zezat e veta *

ata që shkojnë pas zotave të huaj.

Unë nuk do t'u flijoj fli njomjeje gjakrash, *

buzët e mia nuk do t'ua përmendin emrat.

Zoti është pjesa e trashëgimit tim dhe gota, *
 në dorën tënde është fati im!
 Shorti më ra në më të mirën tokë: *
 pjesa e trashëgimit tim tesve më pëlqen!
 E bekoj Zotin që më dha kuptim, *
 edhe natën veshkat e mia më mësojnë.
 Zotin e kam gjithmonë para sysh, *
 më rri në të djathtë, nuk kam sesi të rrezohem!
 Prandaj galdon zemra ime, gëzon shpirti im, *
 mbarë trupi im pushon në qetësi.
 S'do të ma lësh shpirtin në Nëntokë, *
 as s'do të lejosh që Shenjti yt të kalbet në dhë.
 Ti do të ma tregosh udhën e jetës, †
 gëzimin e plotë para fytyrës sate, *
 Kënaqësinë e amshueshme në të djathtën tënde.
 Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen

Ant. 1

*Në dorën tënde është fati im, o Zot,
 mbarë trupi im pushon në qetësi.*

Leximi i shkurtër 1 Sel 5, 23

Hyji, burimi i paqes, ai ju shenjtëroftë krejtësisht, dhe e tërë qenia juaj - shpirti, jeta dhe trupi - ju ruajttë e patëmetë dhe e përsosur për ardhjen e Zotit tonë Jezu Krishtit!

Përgjigja e shkurtër

C O Zot, * në duart e tua po e dorëzoj shpirtin tim.

O Zot, në duart e tua po e dorëzoj shpirtin tim.

D O Hyj i së vërtetës, ti më ke shëlbuar:

në duart e tua po e dorëzoj shpirtin tim.

Lavdi Atit e Birit e Shpirtit Shenjt.

O Zot, në duart e tua po e dorëzoj shpirtin tim.

Ant. *Na shpëto, o Zot, derisa rrimë zgjuar;
 na ruaj kur flemë: që të rrimë zgjuar me Krishtin
 dhe të gjejmë prehje në paqe. (K. P. aleluja)*

Kënga e Simonit Lk 2, 29-32

Krishti, drita e popujve dhe lavdia e Izraelit.

Tani, o Zot, mund të lejosh të vdesë *
 shërbëtori yt në paqe sikurse the ti vetë,

sepse me sytë e mi e pashë shëlbimin *
 që ti e bërë gati në sy të të gjithë popujve:

Dritën që bën të njohin Ty paganët *
 e që i jep nder popullit tënd, Izraelit.

Lavdi Atit e Birit *
 e Shpirtit Shenjt,
 si ka qenë në fillim, *
 ashtu tash e përgjithmonë e jetës. Amen

Ant. *Na shpëto, o Zot, derisa rrimë zgjuar;
 na ruaj kur flemë: që të rrimë zgjuar me Krishtin
 dhe të gjejmë prehje në paqe. (K. P. aleluja)*

Lutja

Mos na lëntë kurrë, po të lutemi, o Zot, hiri yt, ai na forcoftë më fort në shëlbimin tënd dhe përherë na dhashtë ndihmën tënde. *Nëpër Zotin tonë*

Edhe kur Pasmbrëmësorja thuhet personalisht, vijon bekimi:

Zoti i gjithëpushtetshëm na dhuroftë një natë të qetë
 dhe një mbarim të mirë.

C Amen.

Të falemi Mbretëreshë, Nëna e mëshirës, jeta, ëmbëlsimi e shpresa jonë, të falemi! Ty të thërrasim ne të shkretët, bijtë e Evës, që po fshajmë, po gjëmojmë e po qajmë në këtë shekull plot me lot. Deh pra, pajtorja jonë, ata sy të mëshirshëm të tu sillti prej nesh!

E Jezusin, të bekuarin, frytin e barkut tënd, pas kësaj shkretie na e kallxo. O e dhimbshmja, o e buta, o e ëmbla Virgjëra Mari! Amen.

Nën mbrojtjen tënde po ngasim, o shenjta Nëna e Hyjit, mos na i përbuz lutjet ndër nevoja tona, por, o virgjëra e lume dhe e bekuar, na shpëto përherë prej të gjithë rreziqesh, Zoja jonë, dhe ndërmjetëse e jona. Me Birin tënd na pajto, Birit tënd na porosit ndër duar të Birit tënd na lësho.